

1 Pedro

¹ Høøch xøhajt Pedro. Jesucristøch xquiuguexyhajt. Mijts hädaa nocy nyajnajaayøøby pønjatiä Diosmädia'agy mäbøjp. Xii yaa hajxy wiingtuumjaty mhadsäna'ay jim maa naax jaduhñ xìøhatiän Ponto, møød jim Galacia, møød jim Capadocia, møød jim Asia, møød jim Bitinia.

² Jequiän mijtsä Diosteedy xwyiimbiiyy. Tøø Dios hänajty ñajuø'øy coo mijtsä miädia'agy hänajty mmäbøgaanä. Ja'a yhEspirituhaamä Dios hajxy tøø xyaghodiägø'øy, weenä mädia'agy hajxy jaduhñ mmäbøgät ja'a Jesucristocøxpä. Jaaya'ay hajxy tøø xyajnhwáatsäm mänaa hajxy xñähho'túutäm. Weenä Dios ja'a hoyhajtä weenhajt hajxy xmio'oy møj may.

³ Tsögä Dios hajxy wiingudsähgøøyyäm. Jaaya'ayä Jesucristo Tieedyhajpy. Højtsä Jesucristo nWiindsøn'hájtäm. Hojiotä Dios jiaançh tehñ miøød ja'a højtsøxphájtäm, paady hajxy homiänaajä xyagjyhadáañäm neby je'e jiugyhatiän. Coo Dios ja'a Jesucristo yagjyypiojtägajch coo hänajty tøø yho'ogy, jaduhñä tøyhajt hajxy nmøødhájtäm coo Dios hajxy jaduhñ xjiaançh yagjyhadáañäm homiänaajä ⁴ jim tsajpootyp. Jimä hoyhajtä weenhajt hajxy møj may xmio'owáañäm, neby jaduhñ jecy miänaañän cooc hajxy hänajty xmio'owáañäm. Tijaty hajxy yaa nyagjyghájtäm hädaa yaabä naaxwiin, tsipcøxp jaduhñ quiøxa'añ, tsipcøxp jaduhñ quiuhdägoyya'añ. Pero mädyiijatiä Dios hajxy jim xmio'owáañäm tsajpootyp, cab jaduhñ mänaa quiøxa'añ, cab jaduhñ mänaa mia'ada'añ, cab jaduhñ mänaa quiuhdägoyya'añ. Homiänaajä yajxonñ yhida'añ.

⁵ Coo mijtsä Dios miädia'agy jaduhñ mmäbøjcä, paadiä

Dios hajxy xcwieendähada'añ ja'a miøcmäjaahaam. Cab hajxy jaduñ mänaa mguhdägoyya'añ. Coö ja'a Dios yHuung yaa quiädaactägatsa'añ hädaa yaabä naaxwiin, ja'a Jesucristohajpä, mäniit hajxy jim xyajncxáanäm tsajpootyp Dioswiinduum. Jimä Dios hajxy homiänaajä xyagjyghadäänäm neby je'e jiugyhatiän.

⁶ Paady mijts jootcujc mhity, hoy hajxy jäda'ahaty madiu'u mja tsaaçhpøcy. Pero cab hajxy jejcy md-saaçhpøga'añ. ⁷ Høxtahmäsä oro, jøønhaamä jäya'ayä oro hajxy yhiixmach pø hoyhoro jaduñ. Jaanä jaduñ mijtsä Dios xyhiixmajtspä pø hamuumdu'jootä miädi-a'agy hajxy mmäbøjcä, hoy hajxy mja jaançh tehñ chaaçhpøcy. Jaançh tehñ choobaatp jaduñ coö hajxy jaduñ mmäbøgät tehngajnä. Cabä oro jaduñ jiaty tsoobaady neby jaduñ choobaadiän nej mijts homiänaajä mmäbøquiän. Hix, tsipcøxpä oro jaduñ quiuhdägoyya'añ. Y coö Jesucristo yaa quiädaactägatsa'añ, mäniit mijts xquiumaya'añ je'eguiøxpä coö hajxy hänäjty tøø mmäbøcy, hoy hajxy hänäjty tøø mja jaançh tehñ chaaçhpøcy.

⁸⁻⁹ Hoyyä Jesucristo hajxy tøø mga'a jagä hixy, md-sojpy mba'häyooby hajxy jaduñ, y mmäbøjcäbä miädi-a'agy hajxy jaduñ. Hoy hajxy tøø mga'a jagä hixy, coö hajxy jaduñ mmäbøcy, paady hajxy jaduñ tøø xyajnähwa'açh. Coö hajxy jaduñ tøø xyajnähwa'açh, paady hajxy jaduñ mjaançh tehñ xioonda'agy nägø'ø nädecypä.

¹⁰ Ja'a jäya'ayä Diosmädia'agy hajxy jecy yajwá'xäbä, jia wi'i yajtøoby jia wi'i yajtø'xyp hajxy hänäjty neby hajxy piäda'agøøjät hawa'adstuum. Cab hajxy hänäjty ñajuø'øy neby hajxy jaduñ jim piäda'agøøjät. Pero ñägapx hajxy jaduñ coö mijtsä Dios hänäjty xpiäda'aga'añ hawa'adstuum, je'eguiøxpä coö hojioot miøødä. ¹¹ Yajtøoby hajxy

hänajty pøn mijts hänajty min xpiäda'aga'añ hawa'ad-stuum. Jaduhñ hajxy hänajty yajtøøbä mänaa hänajty myina'añ. Ja'a Dios jaduhñ hawaanä ja'a yhEspirituhaam cooc tu'jäya'ay hänajty yaa min chaačhpøga'añ. Y cooc hänajty tøø yho'nä, mänítac hänajty jiuypiojtägatsa'añ. Mänítac hänajty jim ñøcxtägatsa'añ tsajpootyp maa Dioswiinduumän. Pero ja'a jecyjiäya'ayhajxy, cab hajxy hänajty jaduhñ ñajuø'øy pønä Dios hänajty tøø ñänømy ja'a yhEspirituhaam. Nä'ä cujahy hajxy jaduhñ nebiaty hajxy jaduhñ ñajtsapxøyyä. ¹² Mänit hajxy jecy yhawáanäxä coogä Dios jaaya'ay hänajty quia'a tsoj quexa'añ, ja'a mijts hänajty xpiäda'agaambä hawa'ad-stuum. Cujéquiägä Dios hänajty quiexa'añ. Hoorä, tøø quiejxnä. Jaduhñ tøø yajtøjiajnä coo ja'a yajnähwaatspä tøø quiejxnä. Y tøø mijts jaduhñ mjaančh mädoyhaty coo ja'a yajnähwaatspä yaa tøø yhoy. Ja'a Jesucristøch jaduhñ nnänømby coo hajxy hoy xñähho'túutäm. Y jaaya'ay mijts xyajmädoyhájtäbä, ja'a Dios ja'a yhEspirituhaam hajxy jaduhñ ñajtsapxøyyä nebiatiä Diosmädia'agy hajxy yajwá'xät. Tsajpootypä Dios ja'a yhEspiritu yajtsohndaacy coo jaduhñ yaa quiejxy hädaa yaabä naaxwiin. Haa ja'a Dios ja'a mioonsähajxiä, ja'a hajxy jaduhñ jim hijpä tsajpootypä, jiaančh tehñ yagjuøøby hajxy jaduhñ coo Dios ja'a yHuang jaduhñ yaa quiejxy hädaa yaabä naaxwiin, coo højts hoy xñähho'túutäm.

¹³ Y coo Jesucristo jaduhñ yaa jadähooc quiädaactägatsa'añ, mänit hajxy jaduhñ jim xyajnøcxäänäm tsajpootyp maa Dioswiinduumän, pønjataiä Diosmädia'agy hänajty tøø miäböcy. Mänitä hoyhajtä weenhajtä hajxy jim ca'xy xmio'owáanäm. Coo Dios jaduhñ tøø miäna'añ coogä yHuang yaa quiädaactägatsa'añ, jaduhñä tøyhajt hajxy nmøødhájtäm coo jaduhñ tiøjiada'añ. Tsøcxä njoot hajxy pädáacäm maa hoyhajtän, maa weenhajtän,

mädyii Dios hajxy hänajty xmio'owáanäm. Tsøcxä hajxy hoy wädíjtäm. Tsøc hajxy jahmiejstáacäm coo Jesucristo yaa quiádaactägatsa'añ. ¹⁴ Coo Dios hajxy xyhuhghájtäm, paadiä miädia'agy hajxy tsøc mábójcäm. Cabä haxøøgwiinmahñdy hajxy jadähooc mbadu'ubójcumbät, neby hajxy hijty mjatcø'øyän coo Dioscapxiä Diosmädia'agy hajxy hijty mga'a mädoyhatyñä. ¹⁵ Ca'a haxøøgjoot ca'a haxøøgwiinmahñdy hajxy myaghity. Hix, cabä Dios haxøøgjoot haxøøgwiinmahñdy ñä'ägädä møødä. Jaaya'ay hajxy jaduñ xyajñähdíjjäm coo hajxy xqui'u'ughadäänäm. Paadiä hojiot hajxy tsøc yaghíjtäm nebiä Dios hojiot miøødän. ¹⁶ Jaduñ jim myiñ cujaay maa Diosmädia'aguiän: “Høøch, cábøchä haxøøgjoot cábøchä haxøøgwiinmahñdy nnä'ägädä møødä. Høøch hajxy pahijx padúunäc”, nømä Dios jecy miänaañ.

¹⁷ Ja'a Dios hajxy nwiingudsähgøøyyäm. NDeedyhájtäm hajxy jaduñ. Paady hajxy hoy tsøc jäya'ayhájtäm mäduhñtiä hajxy yaa ndsänaayy nhäyóowäm hädaa yaabä naaxwiin. Hix, nnajuøøyyäm hajxy jaduñ coo Dios hajxy xyajcumädowäänäm nebiaty hajxy hänajty yaa haxøøg tøø njatcøøyyäm hädaa yaabä naaxwiin, hoy hajxy hänajty näje'e tøø nja mäyøødsänáayyäm. ¹⁸⁻¹⁹ Ja'a nhaphájtäm ja'a ndeedyhájtämhajxy ja'a jegyhajtypä, coo yhamdsoo cuhdujt hajxy hijty hoy quiuidiuñ, jaduhñäc tyijy hajxy ñähwa'adsa'añ. Y jaduñ mijts tøø mbahabøjpä. Pero cab jaduñmbä cuhdujt choobaady. Coo Jesucristo hajxy hoy xñähho'túütäm, ja'a ñø'tyhaam hajxy xpiädáacäm hawa'adstuum. Ni tii hajxy jaduñ xquia'a pädáacäm hawa'adstuum, ni xädø'øñ. Hix, paquiä xädø'øñ quiøxy. Jagooyyä Jesucristo hajxy xpiädáacäm hawa'adstuum ja'a ñø'tyhaam. Hix, cabä Jesucristo ni tii poj ni tii cädieey quia'a møødä. Paady hajxy je'e hoy xpiädáacäm hawa'adstuum. Coo Jesucristo ja'a poj

ja'a cädieey häxøpy miøødhaty, cab hajxy häxøpy tøø xpiädaacäm hawa'adstuum. ²⁰ Jéquiänä Dios ja'a yHuung jaduhñ yajnähdiy cooc hänäjty yaa quiexa'añ hädaa yaabä naaxwiin, cáhnäc hädaa naaxwiimbä hänäjty yhawijy tiøø'xta'agy. Pero cabä Dios ja'a yHuung choj quejxy. Cujecy jaduhñ quiejxy mänaabä højts hänäjty yaa njugyhájtämbä. Højts hoy xñähho'túutäm. ²¹ Coø Jesucristo hänäjty tøø yho'ogy, mänitä Dios yagjujypiøjtägajch. Mänit jim jadähooc yajnøcxy maa wyiinduumän. Jim jäda'ahaty wyiingudsähgø'øyii. Y coø Dios ja'a yHuung jaduhñ yagjujypiøjtägajch, paadiä miädia'agy hajxy tsøc mäbøjcäm coog hajxy xyagjugyhadáanämbä homiänaajä neby je'e jiugyhatiän.

²² Tøyyä Dios miädia'agy. Y coø mijtsä miädia'agy hoy mgudiuunä, paadiä mjootä mjuøhñdyhajxy nähwa'ads yhity. Naxy hajxy jaduhñ mdehmñ ñíchoc mdehmñ ñimiee'xøøjät hamuumdu'joot. Jaduhñ hajxy mnijjääwø'øwøøjät nebiä tu'que'expän nebiä tu'mägu'ugpäñ. ²³ Tøø haxøøgjoot tøø haxøøgwiinmahñdy hajxy nnajtshixøøyyäm. Homiänaajä Dios hajxy xyagjugyhadáanäm neby je'e jiugyhatiän. Jaduhñä hojiootä howyinmahñdy hajxy xmiøøyyäm hawiinjemy, je'eguiøxpä coø miädia'agy hajxy nmäbøjcäm. Cabä miädia'agy mänaa quiuhdägoyya'añ. Jaaya'ay hajxy jaduhñ xyagjugyhadáanäm homiänaajä neby je'e jiugyhatiän, ca'a piønä hädaa yaabä naaxwiimbä, ni ja'a ndajhájätäm ni ja'a ndeedyhájätäm. Haa ja'a hädaa yaabä naaxwiimbä jugyhatjä, tsipcøxp jaduhñ quiøxa'añ. ²⁴ Jaduhñ jim myiñ cujaay maa Diosmädia'aguiän:

Høxtahmñsä pøjy, hoy jaduhñ jia yajxonä, tsipcøxp je'e ñä'ägä tø'øch.

Jaduhñ mäwiin højtshájätäm, hoy hajxy møj jaançh nja nijjääwøøyyäm, tsipcøxp hajxy nnä'ägä ho'og

nnä'ägä tägoyyáanäm.

²⁵ Pero ja'a Diosmädia'agy, cab jaduñ mänaa quiøxy tiägoy.

Ja'a Diosmädia'agy jaduñ mänaamb coogä Jesucristo hajxy hoy xñähho'túutäm. Tøø mijtsä jäya'ay jaduñ xya-jmädoxyhaty, ja'a Diosmädia'agy hajxy jecy yajwá'xäbä.

2

¹ Coø Dios hajxy homiänaajä xyagjyghadäänäm neby je'e jgyghatiän, jaduñä hojiootä howyiinmahñdy hajxy tøø xmióoyyäm hawiinjemy. Paadiä haxøøgjootä haxøøg-wiinmahñdy hajxy tsøc najtshixóoyyäm cøxiä. Cab hajxy mnä'ägä høhndá'agät ni weeñtiä. Hamuumdu'joot hajxy jaduñ tøy mjaançh hojiäya'ayhadät. Jii jäya'ay-hajxy näje'e, cabä Diosmädia'agy hajxy hoy quiudiuñ, hoy hajxy jia nidijyii nebiä hojiäya'ayän. Ca'a hajxy jaduñ mbahixy. Ca'a hajxy pøn cøxiä wiinä myajcuxøøghadø'øy. Cab hajxy mniñähøøn mniñähøjøjät.²⁻³ Tøyhajt jaduñ coø Jesucristo mayhajt møj may tøø tiuñ maa mijtsøxpän. Mnajuøøby hajxy jaduñ, túh-mäts. Hahixøøbyxiä jaduñ coø miädia'agy hajxy tehngajnä mbanócät. Høxtahm̄dsä maaxhuunghajxy, coø hajxy hänajty chi'idsa'añ, mänitä tsi'tsc hajxy ñäjø'øy. Jaduñ mäwiin mijtspä, mba'yá'axäp ja'a Dios hajxy coø quiapxiä miädia'agy hajxy ween tehngajnä xjiaac yaghabøcy. Jaduñ hajxy ca'xy pedyii hoy myajtúnät. Y cab hajxy jaduñ mänaa mdudägóyyät.

⁴ Tehngajnä Jesucristo wyiinmahñdy hajxy jaac tehñ piahijxä jaac tehñ piaduunä. Ja'a Dios jaduñ jecy wiinmaayy coø højts hänajty jaduñ xyhuunghadäänäm ja'a Jesucristocøxpä. Ja'a Jesucristo, ja'a Dios yHuung je'e, paadiä cuhdujt jaduñ miøødä coø hajxy nwiingud-sähgøoyyämät. Pero cabä jäya'ayä Jesucristo hajxy näje'e

jiøjpøgø'øy. Cab hajxy wyiingudsähgø'øy. Xiøøghajpy hajxy jaduñ. ⁵⁻⁶ Jaduñ jim myiimbä cujaay maa Diosmädia'aguiän:

Jim maa cajpt jaduñ xiøhatiän Siön, jimhøchä ndsajtøjc tu'ug ngojy.

Tú'ughøchä tsa nwiimbiiyy coo jim piäda'agøøjät maa tøjteecän.

Jaançh tehñ tiuungpaatp yø'ø tsa jaduñ.

Ja'a Dios ja'a Jesucristo jaduñ yajmäbaat nebiä tsa ja'a jaançh tehñ tiuungpaatpän, coo jaduñ yaa quiejxy hädaa yaabä naaxwiin, coo hajxy hoy xyajnähwäatsäm. Jaduñä Dios miänáangumbä cooc tsipcøxp yajtøjiada'añ coo hajxy jim yajnøcxa'añii tsajpootyp maa Dioswiinduümän, pønjaty jaduñ mäbøjp coo Jesucristo hajxy xyajnähwäatsäm, ca'a wyiinghäna'cä. Coe Jesucristo hajxy tøø xjiaançh yajnähwäatsäm, jaduñä Dios hajxy tøø xyajnähdíjjäm coo Jesucristo hajxy nmøødhíjtämät tu'ugmädia'agy. Tehngajnä Diosmädia'agy hajxy tsøc hoy jaac tehñ quiudiúunäm. Tsøgä Dios hajxy hoy jaac tehñ wyiingudsähgøøyyäm. Jaduñä Dios hajxy xquiumáayämät.

⁷ Coe mijts jaduñ mmäbøcy coo Jesucristo hajxy hoy xyajnähwäatsäm, paadiä Jesucristo hajxy mdsocy, paady hajxy mwiingudsähgø'øy. Hoorä, jaduñ jim myíingumbä cujaay maa Diosmädia'aguiän:

Jii tsa tu'ug, cabä tøjmuu'tspädøjc-hajxy hijty hoy yhixy; cab hajxy hijty yajtuna'añ.

Pero ja'a cudøjc, yajxón yø'ø tsa yhixy, paady jim yajpädaacä maa tøjteecän.

⁸ Jaduñ wiingtuum myíingumbä:

Jii tsa tu'ug, coo pøn quiuhnepy, cädaab hajxy jaduñ. Ja'a Jesucristo jaduñ yajmäbaatä neby yø'ø tsaajän.

⁹ Højtsä Dios tøø xyajnáhdíjjám coo miädia'agy hajxy nmäbøjcämät, coo hajxy xquiu'ughájtämät. Xyhu-unghájtäm hajxy jaduhñ coo hajxy ween hoy njäya'ayhájtämät neby je'e hoy jiäya'ayhatiän. Tøø cuhdujt hajxy xmióoyyäm coo hajxy nDeedyhájtämät nebiä Jesucristo ja'a Dios Tieedyhatiän. Tøø Dios hajxy xyajpädsøømäm haxøøgtuum. Hodium hajxy hoy xpiädaactägájtäm. Jaduhñä miädia'agy hajxy nyajwá'xämät coo møjmayhajt tøø tiuñ maa højtsøøxphájtäm. ¹⁰ Coo mijts hijty mga'a mäbøcy, paadiä Dios hajxy hijty xquia'a cu'ughaty. Cabä Dios hajxy hijty xñäxuuçh. Pero coo hajxy jaduhñ mmäbøjnä, paadiä Dios hajxy jaduhñ xñäxuu'tsnä. Paady hajxy xquiu'ughajnä.

¹¹ Mägu'ughajpädøjc, hoy hajxy yaa nja híjtäm hädaa yaabä naaxwiin, cabä njoot hajxy yaa tøø nbädáacäm maa hädaa yaabä naaxwiimbän. Jimä njoot hajxy tøø nbädáacäm maa Dioswiinduumän. Tsøcxä haxøøgwiinmahñdy hajxy høxhíjxäm, jaduhñä Dios miädia'agy hajxy hoy ngudiúunämät. ¹² Hoy hajxy mja hity maa jäya'ayä Diosmädia'agy hajxy quia'a mäbøquiän, hoy hajxy mwädítät. Hoy hajxy jaduhñ mjäya'ayhädät, hoyyä jäya'ay hajxy cu xjia nähøønø'øw. Coo Dios yaa quiädá'agät tøyhajtyajyepä, mänit mijtsä jäya'ay hänäjty xyhixa'añ coo mijtsä Dios miädia'agy hänäjty hoy tøø mjaançh cudiuunä, ja'a Diosmädia'agy hajxy hänäjty tøø quia'a mäbøquiäbä. Mänitä Dios hajxy wyiingudsähgø'øwa'añ.

¹³ Mwiingudsähgøøyyäbä tuungmøødpä miädia'agy hajxy. Cabä pøn jaduhñ waamb xñänómät. Hix, mbanøcxypä Diosmädia'agy hajxy jaduhñ. Y coo ja'a tuungmøødpä miädia'agy hajxy mga'a wiingudsähgøøyyät, mäna'anaambä jäya'ayhajxy jaduhñ coogä mädia'agy quia'a hoyyä, ja'a mijts jaduhñ mbanøcxypä. Mwiingud-

sähg'óyyäbä gobiernä miädia'agy hajxypä. Jaaya'ay mõjtuung jaduñ näl'ägä mõød. ¹⁴ Mwiingudsähg'óyyäbä gobiernä mioonsä miädia'agy hajxypä, ja'a hajxy jaduñ mõjtuungmõødpä. Pønjaty jaduñ cädiehy, je'e hajxy jaduñ yajcumädooby. Pønjaty hoy jäya'ayhajp, je'e hajxy jaduñ quiumaaby. ¹⁵ Jaduñnä Dios chocy coo hajxy hoy mjäya'ayhädät. Jii jäya'ayhajxy näje'e, cabä Diosmädia'agy hajxy näl'ägädä wiinjuø'owa'añ. Jaanč tehñ quiuhxex hajxy jaduñ. Hoy hajxy jaduñ quia'a jagä wiinjuø'owa'añ, nõm hajxy wyi'i miäna'añ cooc tyijy ja'a Diosmädia'agy quia'a hoyyä. Hoorä, coo mijts tøyhajt mhojiäya'ayhädät, caj mijtsä jäya'ay hoy xñähøønó'øwät, ja'a Diosmädia'agy hajxy ca'a wiinjuø'owaambä.

¹⁶ Näje'ejä jäya'ayhajxy miäna'añ cooc tyijy cuhdujt hajxy miøødä coo hajxy hoñejpiä jiatcó'øwät, je'eguiøxpä coogä Jesucristo hajxy tøø yajnähwa'ačhii. Pero cab jaduñ tiøyyä. Cab jaduñ yhooyä coo hoñejpiä njatcøøyyämät. Pero tsøgä Dios miädia'agy hajxy cudiúunäm nebiaty hajxy xyhanéhäm. ¹⁷ Mwiingudsähg'øwäbä jäya'ay hajxy nägøxiä. Mničhoc mnimiee'xøøjap hajxy pønjatiä Diosmädia'agy mäbøjp. Mwiingudsähg'øwäbä Dios hajxy, jaduñnä gobiernä hajxy mwiingudsähg'øbiät.

¹⁸ Mijtshajxy moonsähajpä, mmäbøjcäbä mwiindsønä miädia'agy hajxy. Mwiingudsähg'øwäp hajxy jaduñ, hoy hänäjty yhojiäya'ayä quia'a hojiäya'ayä. ¹⁹ Coo mwiindsøn hajxy xchaächtiúnät näl'ä nägoobä, hoy hajxy hänäjty tøø mga'a jagä cädieey, mmee'xtúgäp hajxy jaduñ. Mnajuøøby hajxy jaduñ coo Dios hajxy jaduñ xquiumáyät. ²⁰ Pero pø tøø hajxy hänäjty mjaanč cädieey, hahixøøby jaduñ coo hajxy mgumädówät. Y cabä Dios hajxy jaduñ xquiumáyät, hoy hajxy cu mja mee'xtuc. Pero pø cab hajxy hänäjty tøø mgädieey,

coo mwiindsón hajxy nä'ä nägoobä xyajcumädówät, y coo jaduhñ mmee'xtúgät, mänitä Dios hajxy jaduhñ xquiumáyät. ²¹ Jaduhñä Dios hajxy tøø xyajnähdíjjäm coo häna'c hajxy nä'ä nägoobä xchaačhtiuunämät nebiä Jesucristo chaačhtiuunän. Hix, hõjts jaaya'ay xñäh-ho'túutäm. Y miee'xtujc jaduhñ. Jaduhñä Dios chocy coo Jesucristo hajxy nbahíjxämät neby je'e miee'xtujquiän. ²² Cabä Jesucristo mänaa ñä'ägä cädieey. Ni mänaa quia'a hõhnda'agy. ²³ Coo haxøøg jia nämäaayyä, cab haxøøg yhadsoodägajch. Coo chaačhtiuunä, cab jaduhñ waamb miänaañ coo hänajty yaghawiimbijtagatsa'añ. Ja'a Dios quio'øjooty je'e ñibiädaacä. Hix, ñajuøøbiä Jesucristo hänajty jaduhñ coo jäya'ayhajxy hänajty nägøxiä yajtøyhajtyega'añii ja'a Diósäm. Jaduhñä Dios hajxy xyhíjxäm neby hajxy njäya'ayhajtäm. ²⁴ Coo Jesucristo hajxy hoy xñäh-ho'túutäm cruzcøxp, jaduhñä nbojpä ngädieey hajxy xyajnähwáatsäm. Tsøcxä ja'a haxøøgwiinmahñdy hajxy natshixøøyyäm. Tsøc hajxy jahmiejtstáacäm coo Jesucristo hajxy nmøødhíjtäm tu'ugmädia'agy mänaa yho'oguiän, mänaa jiuypiojtagachän. Paady hajxy njugyhadaañäm homiänaajä nebiä Dios jiu gyhatiän. Coo hajxy jaduhñ ngudiúunämät nebiä Dios hajxy xyhanéhmäm, mänitä Dios hajxy jaduhñ xquiumayáañäm. ²⁵ Jaduhñ mäwiin hajxy hijty njäya'ayhajtäm nebiä meeghajxy tiägowiäditiän jäguemduum. Cabä mädia'agy hajxy hijty nmäbójcäm ja'a Jesucristocøxpä. Pero tøø hajxy nmäbójcänä. Y xcwieendähajtämä Jesucristo hajxy jaduhñ.

3

¹⁻² Mijts to'oxiojtøjc, mwiingudsähgø'øwäbä mnihyhap hajxy. Coo mnihyhapä miädia'agy hajxy hoy mgudiúunät, y coo Jesucristo hajxy mwiingudsähgø'øwät, wehñdä mnihyhapä Diosmädia'agy hajxy

miäböät, pø cahnä hajxy hänäjty miäböcyñä, hoy hajxy hänäjty waamb mga'a jagä näma'ay coo hajxy ween miäböcy. ³⁻⁴ Je'e ja'a Dios jaduñ quiumaaby coo hojioot hajxy mmøødhädät, coo mnihyhap hajxy mee'xxieemy mmägápxät. Je'eds jaduñ tsoobaatp coo Diosmädia'agy hajxy jaduñ mgudiúnät hamuumdu'joot. Y cab hajxy jaduñ mänaa mdudägóyyät. Cab hajxy myajcumáyät pø jii howyit hodiucxy hajxy hänäjty mmøødä, pø jii oronaamsøm, pø jii orotaatstøy hajxy hänäjty mmøødä, pø hoyyä mguhwaay hajxy howyit hoguiuhxotshaam hänäjty mgu'udy. Cabä Dios yø'øduhmä jiaty möjpäda'agy, ni jaduñ quia'a jega'añ. ⁵ Ja'a to'oxiøjcä Diosmädia'agy hajxy hijty jegyhajty panøcxpä, wyiingudsähgøøbiä ñihyhap hajxy hijty. Mee'xxieemy hajxy hijty. Miäböjpiä Diosmädia'agy hajxy hijty coo hajxy hänäjty cwieendähada'añii ja'a Diósäm. ⁶ Jaduñä Sara ja'a ñihyhap jecy wyiingudsähgøøyy, ja'a Abrahamhjäp. Mee'xxieemy hänäjty miägäpxy. Quiumaayy ja'a Dios ja'a Sara jaduñ. Y mijts to'oxiøjtøjc, jaduñ mijtsä Dios xquiumáabiät coo mijtsä Sara wyiinmahñdy mbahijx mbadúunät. Hoy hajxy mwädítät ja'a Diosøxpä. Y cabä mhaa mjoot hajxy myagjádät cooc tyijy ja'a mnihyhap hajxy hänäjty mmägäpxtägoy.

⁷ Jaanä jaduñ mijts nmägäpx nhanehmä, mijts ya'adiøjtøjc. Mdsoc mmée'xäbä mdo'oxiøjc hajxy. Mmøødhädäbä hojioot hajxy jaduñ. Hix, cabä to'oxiøjcä miäjaahajxy miäbaady nebiä ya'adiøjc-hajxy miøcän. Paady hajxy mgüeendähädät. Hix, xmiooby mijtsä Dios ja'a hoyhajtä weenhajt näguipxy møødä mdo'oxiøjc. Hix, näguipxiä Dios hajxy xyajñhwa'açh møødä mdo'oxiøjc-hajxy. Tiuumbiä Dios mayhajt jaduñ. Pero coo mdo'oxiøjc hajxy mga'a tsoc mga'a méé'xät, xiøøbä Dios hajxy jaduñ mnä'a pa'yáaxnät.

⁸ Mägu'ughajpädøjc, jaduñ hajxy homiánaajä mnä'ägä ničoc mnä'ägä nimiee'xóøjät nebiä tu'ugmägu'ug nebiä tu'ugpuhya'ayän. Mniñaxuudsóøjäp hajxy jaduñ hamiñ haxøpy. Mee'xxieemy hajxy mnimiøødcapx mnimiøødmädia'agóøjät. Jaduñ hajxy mhídät tu'ugmädia'agy nägøxiä. Jaduñ hajxy hoy mdsänä'awät nägøxiä. ⁹ Coo mijts pøn cøxypänejpiä xtiúnät, cab hajxy myaghawiimbijtagátsät. Y coo hajxy pøn xwyiinwóonät, cab hajxy mhadsoowiimbídät. Mmānuu'xtá'agäbä Dios hajxy jaduñ coo ween piuhbedyii ja'a tøø xwyiinwóoñäbä. Jaduñ mijtsä Dios tøø xyajñhdijy coo Dios ja'a hoyhajtä weenhajt hajxy xmió'owät.

¹⁰ Pø mdsøjpiä mhoyhäyow ja'a mhočhāna'a hajxy, cab hajxy mānaa mhøñdá'agät.

Cab hajxy mānaa mgapxtägóyyät.

¹¹ Mnajtshixó'owäbä mhaxøøgwiinmahñdy hajxy.

Hoy hajxy mjäya'ayhádät. Cab hajxy mnimiädsip mnimiäma'adóøjät ni mānaa.

¹² Hiç, cwieendähajpiä Dios pønjatiä miädia'agy mábójcäp.

Y coo Dios hajxy miānuu'xta'agy, mänit hajxy piuhbedyii. Pero ja'a häna'c-hajxy haxøøg wädijpä, cab hajxy ñäxu-
učhii ja'a Diósäm,
nømä Diosmädia'agy miāna'añ.

¹³ Hoorä, coo hajxy hamuumdu'joot mhojiäya'ayhádät, cab hajxy jaduñ pøn cøxypänejpiä xtiúnät. ¹⁴ Jii jäya'ay-hajxy näje'e, mijts xjia wi'i chaačhtiunaamb, hoy mijts mja hojiäya'ayhaty. Pero ca'a hajxy mdsähgø'øy; ca'a hajxy tii mdajy mmay. Ja'a Dios hajxy jaduñ xcwieendähadaamb. ¹⁵ Hamuumdu'jootä Jesucristo hajxy mwiingudsähgø'øwät. Hiç, jaaya'ay hajxy nWiindsøn'hájtäm. Y coo hajxy pøn xmiäyajtówät tiigu-
iøxpä Diosmädia'agy hajxy hānajty coo mmäbøcy, cab

hajxy mdsähgö'owät; mnägápxäp hajxy jaduhñ tiigu-
iöxpä hajxy coo mmäbøcy. Mee'xxieemy hajxy jaduhñ
mhadsówät, ca'a yhajootma'adä. ¹⁶ Nägüeentä hajxy
tehngajnä mwädítät, coo hajxy jaduhñ mnä'ä cädiéeyät.
Jaduhñä tøyhajt hajxy mmøødhádät coo hajxy hánajty
hoy mwädity. Hoy hajxy mwädítät, hoyyá jáya'ay hajxy
xjia náhojy xjia náya'axy coo Jesucristo miädia'agy hajxy
hoy myajtuunä. Coo hajxy jaduhñ hoy mjaançh wädítät,
mánitá häna'c-hajxy jaduhñ chähdiuna'añ coo mijts hä-
najty jaduhñ tøø xñänømy.

¹⁷ Hoy jaduhñ coo hajxy hoy mwädítät, hoy ha-
jxy hánajty mja tsaächpøcy. Hix, ja'a Dios hajxy hä-
najty tøø xyajnáhdijy coo hajxy táhoocjaty mdsaaçh-
pógät, hoy hajxy hánajty mja howiädity. Pero coo
hajxy hánajty haxøøg mjatcø'øy, cab jaduhñ yhooyä;
mgumädówäp hajxy jaduhñ. ¹⁸ Hoyyá Jesucristo mä-
naa quia'a jagä cädieey, tsaächpøjc je'ebä. Coo ha-
jxy hoy xñähho'túutäm, jaduhñä nbojpä ngädieey hajxy
xyajnáhwáatsäm. Y jaduhñ hajxy jim xyajncxáanäm
Dioswiinduum. Tähooquiä hajxy xñähho'túutäm. Ja'a
ñi'xä quiopc-hajtiä jaduhñ ho'c. Pero ja'a jiootä yh-
Espíritu, cab jaduhñ ñä'ä ho'cy; jujyñä hánajty jaduhñ
yhity. ¹⁹ Ja'a jiäwøhñdyhaamä Jesucristo yhooyy maa
ho'ogyjiäya'ayhajxy hánajty tsumy yhitiän. Jimä hawi-
injemybiä mädia'agy hajxy hoy yajwiingapxø'øyii coogä
Dios ja'a Jesucristo hánajty tøø quiexy mäyajnähwaatspä.
²⁰ Paady hajxy hánajty tsumy yhity je'eguiöxpä coo Dios-
mädia'agy hajxy jecy quia'a mabøjcy mänaa Dios jia nä-
gapxiän coo nøøgomdägoy hánajty tiägø'øwa'añ, mänaa
Noé ja'a biarco hánajty yhädiuñän. Cabä Dios mänitiä
yajtägøøyy tuubä. Jia hahijx jecy pø mabøgaanäxäbä
miädia'agy hánajty. Coo jaduhñ yhijxy coo hajxy hä-
najty nämay quia'a mabøga'añ, mänitäts yajtägøøñä tu-

ubä. Mänitä nøøgomdägoy tiägøøñä. Jagooyä Dios yhijxy coo Noéhajxyhajtiä hänajty miäbøga'añ, ja'a hajxy hänajty näductújjiäbä. Jagooyä Noéhajxy jaduhñ miäbøjcy. Je'eds hajxy jaduhñ jiiby tsooc barcojooty, ja'a hajxy hänajty tøø yhädiúñäbä. ²¹ Nebiä Noéhajxy jecy chooquiän jiiby barcojooty mänaabä nøøgomdägoy jaduhñ tiägø'øyän, jaduhñ mäwiinäts je'e miäbaady néjjiäm coo hajxy nnäbéjtäm nøøjooty, coo Jesucristo hajxy xyajnáhwáatsäm mänaa jiuypiojtägachän. Paady hajxy jaduhñ nnäbéjtäm nøøjooty, hijxtahñd jaduhñ coo hajxy nnähwáatsäm. Ja'a ngorazonghajxy jaduhñ wáatsäm, ca'a ja'a nni'xä ngopc-hájtäm. Coo hajxy jaduhñ nnäbéjtäm, jaduhñä Dios hajxy hamuumdu'joot nhawáañäm coo Jesucristo miädia'agy hajxy nnä'ägädä panøcxáañäm. ²² Coo Jesucristo hänajty tøø jiuypiojtägach, mänit jimñ ñøcxy tsajpootyp. Jimñ yhäñaañä maa Dios quiø'ø hahooyyaampiän. Je'e jaduhñ ñänøømby coo cuhdujt jimñ miøødä møj jaančh. Hiñ, wiingudsähgøøyyäbä Jesucristo jimñ. Ja'a Dios mioonsähajxy, ja'a hajxy jimñ hijpä tsajpootyp, je'eds hajxy jaduhñ mäwiingudsähgøøby, møødä cuhdujtmøødpähajxy. Høxtä møjcu'ubaadyhajxy yhane'emyii ja'a Jesucristäm.

4

¹ Coo Jesucristo chaačhpøjcy, miee'xtujc ja'a tsaáčpä jaduhñ. Jaanä jaduhñ mijtspä, coo Jesucristo hajxy mmøødhity tu'ugmädia'agy, paady hajxy jaduhñ mmee'xtújpät, coo hajxy hänajty pøn xyajtsaačhpøcy. Coo hajxy jaduhñ mjaančh tsaáčhpøjöpät nebiä Jesucristo chaačhpøjquiän, jaduhñ hajxy myajcähxó'øgät coo mhaxøøgwiinmahñdy hajxy tøø mhøxhijxnä. ² Coo mhaxøøgwiinmahñdy hajxy jaduhñ mjaančh høxhíxät, hoy hajxy jaduhñ mjäya'ayhada'añ mäduhñtiä hajxy yaa

mjaac hida'añ hädaa yaabä naaxwiin. Jaduhñä Dios hajxy xquiumáyät. ³ Jue'e mijts hijty, haxøøg hajxy hijty mjatcø'øy nebiä häna'c-hajxy jiatcø'øyän, ja'a Diosmädi-a'agy hajxy ca'a mäbøjpä. Cab jaduñ yhäxixø'øy coo hajxy jaduñ mjatcøøñät. Hanaxiä hajxy hijty haxøøg mjatcø'øy. Hanaxiä jocnøø hajxy hijty mjaanč tehñ yhu'ugy mjaanč tehñ jiøø'xy coo xøødsuu hijty maa jiadyii. Tsähdiuhñdägoy hajxy hijty mjatcø'øy, ya'adiøjc møødä to'oxiøjc. Jäya'ayhadsejtsnaxy hajxy hijty naxy mwiingudsähgøøby møødä jäya'ayhabojsnaxy. ⁴ Y ja'a jäya'ayä Diosmädi-a'agy hajxy ca'a mäbøjpä, ja'a mijts hijty naxy mmägu'ughajpiä, yagjuøøby hajxy jaduñ coo mijtsä mhaxøøgwiinmahñdy mga'a yaghanajxnä neby hajxy hijty myaghanaxiän. Paadiä mmägu'ughajpä hajxy jäda'ahaty xñähojnä. ⁵ Pero coo Dios jaduñ yajñähdíjät coo hänäjty tøø yhabaatnä, mänit hajxy hänäjty tiøyhajtyega'añ maa Dioswiinduumän. Mänitä hajxy yajcumädowna'añii ja'a Diósäm, hoy hajxy hänäjty jia jujyquiä, hoy hajxy hänäjty tøø jia ho'ogy. ⁶ Hiç, jaduñä Dios jiøot chocy coo ho'ogyjiäya'ayä miädi-a'agy hajxy ween miäböjçäxä, paadiä Dios ja'a yHuung Jesucristo jim quiejxy maa ho'ogyjiäya'ayhajxy hänäjty tsumy yhitiän. Jimä Jesucristo ja'a Diosmädi-a'agy hoy yajñähixø'øy coogä Jesucristo miäyajnähwa'ačh. Jaduhñägä ho'ogyjiäya'ayä jäwøhñdyhajxy homiänaajä jiugyhádät nebiä Dios jiugyhatiän, hoyyä ñi'xä quiopc-hajxy hänäjty tøø jia ho'ogy.

⁷ Habáatnäp jaduñ coo naaxwiimbä wyiimbidaañnä. Paady hajxy tehngajnä mniyajcopcø'øwøøjät nebiä mjoot hajxy yaa mga'a pädá'agät maa hädaa yaabä naaxwiimbän. Jaduhñä Dios hajxy hoy mba'yá'axät hamuumdu'joot. ⁸ Je'e jaduñ nä'ägä tsoobaatp coo hajxy hamiñ haxøpy mničhoc mnimiee'xøøjät. Hiç, coo

hajxy hamiñ haxøpy nničhójcämät, mänit hajxy hoy nnimiämée'xämät. Jaduhñ hajxy hoy ndsänäayyämät. ⁹ Coo pøn jim quiuyo'oy quiunaxø'owät maa mjøøn maa ndøjc-hajxiän, hamuumdu'joot hajxy myajtøjtägó'owät. Myajcay myaghú'ugäp hajxy jaduhñ hahoy haween. ¹⁰ Cøjwiinduumä Dios wiinmahñdy hajxy xmióoyyäm coo tuuñg hajxy wiingjaty nmøødhájtäm. Jaduhñä jäya'ayhajxy nägøxiä piuhbedøøjtät, ja'a hajxy hánajty tøø miäbøquiäbä ja'a Jesucristocøxpä. Jaduhñ hajxy mnibihbedøøjtät nebiatiä Dios tuuñg hajxy cøjwiinduum tøø xmió'oyän. ¹¹ Pønjaty tøø tiuunngmo'oyii coo Diosmädia'agy hajxy jajwá'xät, hoy hajxy quiapx miädiá'agät nebiä Dios quiapxy miädia'aguiän. Pønjaty tøø tiuunngmo'oyii coo hajxy miäbuhbédät, ween hajxy jaduhñ hamuumdu'joot miäbuhbety. Ja'a Dios jaduhñ puhbédäp. Coo hajxy hánajty tijaty mduna'añ, hoy hajxy mdúnät; jaduhñä jäya'ayhajxy miäbøgät coo Dios miøjjä jiaančhä. Wyiingudsähgø'øwaambiä Dios hajxy jaduhñ je'eguiøxpä coo Jesucristo hajxy hoy xyajnáhwáatsäm. Cøjxta'axiøø ja'a Dios wyiingudsähgø'øwa'añii. Cøjxta'axiøø møjjuhdujt miøødhada'añ. Amén.

¹² Mägu'ughajpädøjc, cab hajxy myagjuó'owät coo tsaächpä hajxy naxy xpiaady møc-haampiä. Hix, tsipcøxpä tsaächpä hajxy xñä'ägä paada'añ. ¹³ Jaduhñ quiähxø'øgät pø hamuumdu'jootä Diosmädia'agy hajxy mjaančh mäbøcy ja'a Jesucristocøxpä, pø caj. Hix, maas hanaxiä Jesucristo chaačhpøjcy mänaa hajxy hoy xñähho'túutäm. Hix, coo Jesucristo hajxy jaduhñ mmøødhity tu'ugmädia'agy, paady hajxy jaduhñ tsipcøxp mbadsaačhpøjpät. Y coo Jesucristo hánajty yaa quiädaactägatsa'añ hädaa yaabä naaxwiin, mänit hajxy hánajty mjaančh tehñ xioonda'aga'añ. Paady hajxy jäda'ahaty mxoondaacnät,

hoyyä tsaächpä hajxy jaduñ xjia paady. Pero cabä tsaächpä hajxy jaduñ myagjuó'owät. ¹⁴ Coö hajxy pøn xñähójät ja'a Jesucristocøxpä, cab hajxy myagjuó'owät. Pero mxooñdá'agäp hajxy jaduñ. Hiḅ, jaduñä Dios ja'a yhEspírituhaam hajxy xpiuhbédät mөөdä wyiinmahñdyhaam. Coö mijtsä jäya'ay xyhíxät coö hajxy mmee'xtucy coö hajxy hánajty mdsaaçhpøcy, mänitä Dios hajxy wyiingudsähgø'owa'añ. ¹⁵ Hahixøoby jaduñ coö hajxy mdsaaçhpøgät, pø tøø hajxy hánajty mmäjäya'ay-yagho'ogy, pø tøø hajxy hánajty mmämeeçh, pø tøø hajxy hánajty myajtägø'øy maa cueendä hajxy hánajty mga'a mөөdän. Cab jaduñ yhooyä coö hajxy jaduñ mjatcø'owät. ¹⁶ Pero je'e mábøcypä caj chähdiuhñdmөөdä coö hajxy mdsaaçhpøgät je'eguiøxpä coö Jesucristo hajxy hánajty mwiingudsähgø'øy. Jootcuyc hajxy jaduñ mhídät. Mnämä'awäbä Dios hajxy “Dioscujú'uyäp” ja'a Jesucristocøxpä.

¹⁷ Tøø yhabaatnä coö Dios hajxy xyajtøyhajtyegáanäm. Coö Diosmädia'agy hajxy nmäbøjcäm, paady hajxy jayøjp xyajtøyhajtyegáanäm, paady hajxy jayøjp xyajtsaaçhpøjcäm. Pero ja'a häna'cä Diosmädia'agy hajxy ca'a mábøjpä, coö hajxy hánajty tiøyhajtyega'añ, maas hanaxiä hajxy hánajty chaaçhpøga'añ. ¹⁸ Siémprämä hojiäya'ayhajxy chaaçhpøga'añ. Maas hanaxiä ca'awiindøyhäna'c-hajxy chaaçhpøga'añ, ja'a Dios hajxy ca'a wiingudsähgøøbiä. ¹⁹ Coö hajxy hánajty pøn xyajtsaaçhpøcy nä'ä nägoobä, cab hajxy mmøjpädá'agät. Tehngajnä hajxy hoy mjaac jäya'ayhádät. Hiḅ, ja'a Dios hajxy hánajty tøø xyajmädsocy coö hajxy mdsaaçhpøgät.

5

¹ Mijts majjäya'adiøjc-hajxy, ja'a hajxy jim tuumbä tsajtøgooty, mijts cham nmägäp x nhane'emaamby.

Nmóødhöçhä cuhdujt jaduñ cooç mijts jaduñ nmägapx nhané'emät, je'eguiøxpä cooç tøø nmäjaabä, møød cooç jim nduumbä tsajtøgooty. Nhijxhó'c-höçhä Jesucristo jim cruzcøxp. Y coo Jesucristo yaa quiädaactägätsät hädaa yaabä naaxwiin, näguipxy hajxy hänajty jim xyajnøcxäänäm tsajpootyp, høøç møød mijts. Jimä hoyhajtä weenhajt hajxy xmi'owäänäm pedyii. ² Mijts majjäya'adiøjc, hoyyä Diosmädia'agy hajxy myajnähiç'øwät hamuumdu'joot, ca'a yhadsip ca'a yhajootma'adä. Hamuumdu'jootä cu'ug hajxy mmägapx mhané'emät. Hiç, ja'a Dios hajxy tøø xpiäda'agy coo cu'ug hajxy jaduñ myajnähiç'øwät, møød coo hajxy mmägapx mhané'emät. Cab hajxy xädø'ñguiøxpä myajnähiç'øwät. ³ Cab hajxy møc møc mhané'emät. Mee'xxieemy hajxy myajnähiç'øwät. Hoyyä Diosmädia'agy hajxy myajtúnät; jaduñä cu'ug hajxy xpiahiç xpiadúnät. ⁴ Y coo Jesucristo yaa quiädaactägätsät, ja'a hajxy nWiindsøn'hájtämbä, mänit hajxy xquiumaya'añ pø tøø hajxy hänajty hoy myajnähiç'øy. Mänit hajxy hänajty jim xyajnøcxa'añ tsajpootyp. Cøjxta'axiøø hajxy hänajty jim mhida'añ.

⁵ Møød mijts muutsc-häna'c, jaduñ mijtspä, mwiin-gudsähg'øwäbä majjäya'ay hajxy. Coø hajxy waamb xmiägapx xyhané'emät, mgudiúnäp hajxy jaduñ. Ha-hoy haween hajxy mnibiuhbedøøjät hamiñ haxøpy, hoy miøjjä hoy miuutscä. Hiç, coø hajxy jootmøj mnibiäda'agøøjät, xyajcumädówäbä Dios hajxy jaduñ. Pøn-jaty capxp mädiaacp mee'xxieemy, je'edsä Dios piuh-bejpy. Móoyyäbä hoyhajtä weenhajt hajxy jaduñ. ⁶ Coø Dios hajxy jaduñ mänaa xyajtsaaçhpögät, cab hajxy mmøjpädá'agät. Jim hajxy mnibiäda'agøøjät maa Dios quiø'øba'c tiēcypia'cän. Møcmäjaa Dios jiaanç tehñ miøød. Hiç, cujequiä Dios ja'a tsaächpä ha-

jxy xyajnáhwá'adsät. Mänit hajxy jootcujc xjiaančh teh̄m yaghida'añ. ⁷ Coó hajxy hánajty tii mnádajy mnámay, mmánuu'xtá'agäbä Dios hajxy jaduh̄n coó hajxy ween xyaghoyøøyyä. Hix̄, homiánaajä Dios hajxy xcwieendähaty.

⁸ Mniyajcopcø'øwøøjäp hajxy; jaduh̄nä Jesucristo miädia'agy hajxy hoy mbanøcxät teh̄ngajnä. Jaduh̄nä møjcu'ugongä wyiinmahñdy quia'a mäjädá'agät. Hix̄, ja'a møjcu'ugong, homiánaajä hajxy jaduh̄n xmiädsiphájtäm. Xjia wi'i jajtu'udägoyyáañäm hajxy jaduh̄n. ⁹ Cabä møjcu'ugongä miädia'agy hajxy mmäbøjcät. Hamuumdu'jootä Diosmiädia'agy hajxy myajtúnät teh̄ngajnä. Hix̄, pønjetiä Diosmiädia'agy mäbøjp wiinduh̄myhagajpt, jaduh̄n hajxy chaächpøjpä nej mijts mdsaaçhpøquiän. ¹⁰ Cab hajxy jejcy mdsaaçhpøga'añ. Coó Dios ja'a tsaächpä hajxy hánajty tøø xyajnáhwa'ačh, mänitä Dios hajxy hamuumdu'joot xyajmäbøgaañnä ja'a Jesucristo miädia'agy. Ca'xy pedyii Dios ja'a wyiinmahñdy hajxy xyajnáhixø'øwa'añ. Ja'a Diósäts hajxy jaduh̄n xcwieendähájtäm, hoy hajxy nej cu nja jajt cu nja habéjtäm. Tiuumbiä Dios mayhajt jaduh̄n maa højtscøxphájtäm. Jaaya'ay hajxy jaduh̄n tøø xyajnáhdíjjäm coó Jesucristo hajxy jim̄ xyajnøcxáañäm tsajpootyp. Cøjxta'axiøø hajxy jim̄ nhidáañäm. Hix̄, cøxiä Dios ja'a hoyhajtä weenhajt hajxy jaduh̄n xmióoyyäm. ¹¹ Cøjxta'axiøø ja'a Dios hajxy tsøc wiingudsähgøøyyäm. Cøjxta'axiøø ja'a Dios møjcuहुdujt miøødhada'añ. Tøyhajt jaduh̄n.

¹² Ja'a mägu'ughajpä Silvano hädaa nocy jahby. Høøčh nnajtsçapxøøyyäp. Cab hädaa nocy jiaty yoñä. Hoyyä Silvano Diosmiädia'agy jiaančh teh̄m jajtuñ. Tøyhájtthøch cham̄ tøø ngapxy tøø nmädia'agy nebiä Dios tøyhajt wyiinmayyän. Tøø Dios møjmayhajt tiuñ maa højtscøx-

phájtäm. Tøø hajxy jaduhñ xyajmädsójcäm coo hajxy jim xmiøødhíjtämät tsajpootyp.

¹³ Ja'a jäya'ayhajxy yaa tsänaabiä Babilonia, ja'a Diosmädia'agy hajxy mäbøjpä ja'a Jesucristocøxpä, xyajpoo'xp mijts jaduhñ. Nej mijtsä Dios xyajnähdijjiän coo miädia'agy hajxy mmäbøjcät, jaanä jaduhñä jäya'ayhajxy yaabä yajnähdíjjäbä coo hajxy miäbøjpät. Jaduhñ mijtsä mmägu'ughajpä Marcos xyajpoo'xpä. Nébiøchä nhamdsoo húungänä Marcos njuø'øy. ¹⁴ Coo hajxy hñajty mhamugø'øy Dioswiingudsähgøøbiä, hamiñ haxøpy hajxy mniyajpoo'xøjät. Jaduhñ hajxy myajcähxø'øgät coo hajxy tøyhajt mniçhocy mnibia'häyoyii hamuumdu'joot.

Pønjetiä Diosmädia'agy panøcxp ja'a Jesucristocøxpä, weenä hoyhajtä weenhajt hajxy mio'oyii ja'a Diósäm. Amén.

El Nuevo Testamento en mixe de Guichicovi **New Testament in Mixe, Isthmus (MX:mir:Mixe, Isthmus)**

copyright © 1988 Wycliffe Bible Translators, Inc.

Language: Mixe, Isthmus

Translation by: Wycliffe Bible Translators, Inc.

Mixe, Guichicovi [mir], Mexico

Copyright Information

© 1988, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

- You must give Attribution to the work.

- You do not sell this work for a profit.

- You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixe, Isthmus

© 1988, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

- You include the above copyright and source information.

- You do not sell this work for a profit.

- You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 19 Oct 2021 from source files dated 9 Oct 2020

4e564219-157f-5807-b810-47a15308b8b8